

四庫全書

集部

欽定四庫全書

文簡集卷五十五

明 孫承恩 撰

墓誌銘

兄守齋先生墓誌銘

先生姓孫氏諱承德字恒甫號守齋世為松江華亭人  
幼有至性九歲喪母哀毀如成人穎悟絕出十一二時  
竊從家人往觀競渡戲比歸先君欲責之諭曰汝能作

一詩當貫汝先生應聲曰虎父懸門日龍舟競渡時屈  
原遺恨在千載楚人思其敏捷類此十四五作論下筆  
滾滾弗休嘗論毛遂自薦曰士有自賢其賢以求售者  
其可謂不自重矣識者韙之時先君官駕部與貂璫構  
隙繫獄幾兩月獄遠數里先生日徒步往候雖風雨弗  
輟歸則斂戢家奴無敢或出先君得無內顧憂十九入  
郡庠名譽焯起宿學多斂衽焉廿五先君遺棄諸孤門  
祚衰薄兼世守清白無厚貲先生搏節經紀以襄大事

罔愆於儀左右勛竭盡心力凡先君志所未就者悉  
以次舉巨細斬斬有叙四入試俱未利中僅獲一廩少  
承家教學問夙成作文多警拔且明敏練達於世務多  
所究知遇則亦有用之才也而卒無成識者惜之夙負  
氣節不為勢利詘負知自守不肯為齷齪事孝友篤至  
每痛早失怙恃遇時饗輒涕泣終日祀事整潔率衆拜  
跪肅然無聲事繼母王宜人如先君事予母阮氏如王  
宜人處予曲盡友愛自先君沒恒以不忝先德相勗學

則規益疾則扶持所以保護教愛者無不至比予叨入  
仕籍數以書戒勉予賦性踈拙先生每慮用是獲戾凡  
遺書必以慎以處已謙以待物為教嗚呼已矣高祖士  
達祖獄司教廣信父衍延平府知府母姚氏贈宜人娶  
顧氏無出以再從兄之子克嗣為嗣生成化丁酉六月  
廿二日卒正德癸酉九月二十七日壽僅三十七歲嗚  
呼予自早歲哭先君爾時孱弱寡知識所依倚者惟兄  
幸令粗底成立方期東歸叙首一笑以為樂而兄則棄

我去矣生平心事欲以少自慰者百不一展號天哭地  
追悔無及嗚呼天實喪予更何言哉更何言哉茲將以  
十一月初三日葬於蟠龍塘祖塋之次伐石誌壙中并  
刻銘曰

蟠龍之原土厚而夷祖也父也在茲吾兄從之百千年  
其永綏乎

東臯陸翁墓誌銘

東海之濱有富而賢者曰東臯翁姓陸氏諱銓字民用

為人勤敏多計算得白圭猗頓遺策兼農耕貨殖致巨  
萬貲甲於一邑而循謹自飭樂行義事歲侵破券蠲除  
宿逋出粟活饑民邑有永興保佑二橋俱當要津而頽  
敝弗治晨暝風雨斷往還官司每議興作輒以重費阻  
翁獨以一家力成之甃石堅確為永久計東鄉地瘠且  
亢河淺淤水無所於蓄雨澤少慳輒旱翁出粟募役濬  
若干里引潮汐灌田幾萬頃人得其利孝友篤至早孤  
撫二弟鉞鉞悉底成立為婚娶置產業鉞卒無子以已

子為之後長公賦餘四十年不擾而事集鄉人訟爭以理道解譬枉直即帖服散去性質實雖處優裕而自奉甚約蔬食布袍終其身人嗤其固則曰吾庶人分當爾也尤不喜世俗炫耀侈大事先是出粟賑饑有司嘉其義如例給冠帶辭不受曰非吾志也晚歲春秋既高方以例受指揮治家寬而有法分授諸子各有成業尤得下人心盡死力其義子達淞澄等翁既卒猶竭力奉諸孤不忍變翁既早歲勤勤以克樹立末可少休而中嘗



遭寇仆而復起且喪其能子詔故垂老猶總家政不倦  
雖稍薄於福然創業者知苦艱不敢自暇逸翁真老成  
幹力人也始祖文旺洪武中判武昌府有政績祖敬父  
猷俱隱配喬孺人先翁卒子四長即詔以例授承事郎  
次諫次誥次訓即弟鉞後女四長適湖廣僉事張君萱  
次贅金雷次適董彰宗次適嘉定李浦孫男八人應昌  
應堂應瑞俱國子生應堂早卒應暉應隆應台應聘應  
用曾孫男四存者可宗可成可學翁生於宣德己卯四

月十六日卒於正德戊寅十二月十三日壽至八十有四識者謂其富而能儉所致應昌以承重卜今年為己卯歲十二月廿四日啓翁壽藏與喬孺人合葬先持僉事君所為狀過余乞銘嗚呼余嘗觀司馬遷傳貨殖累數千言不休不無羨嘆意儒者安義命貨利亦何足道竊怪遷固儒者何乃爾貧富命於天而遊惰不自力以取困者不可謂命則治生亦義所不廢也然單夫窶人信信朝夕且無以庇其身而貨殖家操長策以致厚貲

亦彼所謂才智哉史遷之意其或以是非歟惜乎其擇之弗精而鄙庸嵬瑣者亦得以廁乎其間求有可記之善如東臯翁何尠也以彼鄙庸嵬瑣者且得傳則賢如東臯翁者顧不得銘哉乃為銘曰

世人豐財培剋罔忌虎視鷹攫衆怨攸萃操得其術源源自來矧有惠施踈戚畢懷彼誇者予以歉為足泰然侈肆美食華服躬儉履約靡或踰閑我豈固陋必是乃安惠則近仁儉則近義匪學則然惟質之似東海之壖

有歸一宮子孫靈長慶源所鍾

菊庄陸翁墓誌銘

菊庄陸翁卒之明年其子憲等既得卜吉將塋持狀過  
余請銘其墓石乃掇其世系行能生配卒塋括而著之  
銘曰

陸氏萱諱德芳其字菊庄者何號以所嗜諱全者祖庭  
訓其父敦本力農俱靡宦仕惟華亭有陸聲晉機雲支  
流派別世揚其芬翁實土著無乃其後譜牒失亡遠弗

克究翁性勤敏復多幹能早歲出贅謝氏之門中也不  
樂當食而嘆依婦以家志士所憾翩然來歸我屋我廬  
坐執長策相時轉輸紛其千指如手撮髻汝織汝耕無  
敢曠廢阡陌維連百堵具新充拓自我以休於前人翁  
總區稅越三十年事先衆集靡有過愆鄉人囂叟來就  
翁質折以片辭無更迷執有塘有渠邑侯是咨殫力就  
緒民無流移田賦之敝莫可紀極梳剔蠹源永有程則  
上官是嘉汝才汝庸鄉人是懷亦罔或怨恫我觀天下

事無難易難易在人操術之異維翁治生總統羣奴別其勤惰而待之者殊翁處公事敬慎小心苞苴賂遺毫髮不侵昔有白圭治生之祖與用事僮僕均厥勞苦古亦有言律已治人翁於二者將無有聞我次翁事以及其類豈惟區區可以喻大翁不甚學好善若弗及賑恤糶鰥無少靳惜歲侵蠲逋給粥與棺周施姻戚畢喪與婚翁於諸子和悅以教翁於鄉人犯而不校翁嘗入粟章服是嘉鶴髮紅顏我我烏紗翁好博古法書名刻鼎

彛尊疊蓄以娛客翁自少疾食飲健強六十有六悲命  
弗長翁有治命教詔諸子有橋未成汝畢吾志事佛無  
益信之則愚汝卒此役利濟有餘翁之好德始卒無已  
懿其天資達識若此翁生天順己卯之春卒以嘉靖甲  
申歲冬翁配謝氏側室錢俞共生五男早卒者愈憲慎  
而修克紹翁後曰思恕志亦各競秀鐙錦鏤銚銚銅  
釧銃也最幼皆翁之孫陶杜暨唐翁三孫婿其尚在室  
有幼二女更有五女翁之曾孫惟翁孫曾其來如雲薛

溪之原風氣凝萃葬翁乙酉與謝氏合窆揚潛發幽有誌與銘錦嬪子女故憲來是徵惟史文勝我辭孔質刻之堅珉有永弗沒

柳塘葉翁墓誌銘

嘉靖戊子余官都下鄉人葉淮氏以稅事至乞余記所謂柳塘者曰柳塘淮父別號也嘗疏泉植柳樂其蒲荷魚鳥之勝以遊適焉而因以號也余諾之未果然固已知有柳塘翁矣歲庚寅冬余養病家居淮率諸弟衰經



踵門告曰淮父三月一日謝世矣塋有日敢以墓石之  
文請余憮然傷之又念淮弟濬舊有同筆硯之雅不得  
辭也乃為叙次曰翁諱琪字宗珮先世湖州烏程人也  
凡四徙始來松定居上洋之閘溪葉氏遠祖多仕宦宋  
時有諱叅者官兵部郎中諱夢得者仕至鄜州宣撫使  
入國朝諱處恭者當文皇入靖內難渡江處恭以舟濟  
後論功授官辭不受則翁之曾祖也處恭生漆漆生日  
成皆脩隱德翁少慷慨有幹局年十七代兄總區稅事

無滯留內兄以負租被譴公慨然出代之人皆壯其義  
姪澧徵稅於里豪施姓者施藐其弱故不償又刼脅取  
足券翁適自都下歸憤然走訴部使者得雪嘗入粟受  
散官以勤慎獲上人心郡守內江喻公委督向官橋役  
翁殫盡心力橋成堅整壯密迄今如新建者莆陽鄭啓  
範宰邑時性敏而察左右少當意者而獨愛翁每遇僚  
屬曰使任事者皆如斯人吾庭可空矣嘉靖初年今天  
子即位推恩勅出藏餘賑百姓鄭命翁領其事及浚白

茅河吳淞江凡餉工獎勸之費以萬計出納明慎無私  
黷焉教諸子若孫讀書服農賈惟其才俾各事事故葉  
氏子姓多勤幹自立無廢惰者婚娶慎選名家無苟慕  
富貴意故姻婭多儒門焉翁素强健年幾至耄猶步履  
整整比得末疾日盥櫛不廢獨詔諸子以慎役事卒日  
之晨其子卜之故語吉兆悅翁翁索觀之曰已矣吾弗  
及夕矣頃之遂卒人謂其瀕死猶精明如此傳以為異  
翁生於景泰甲戌七月十六日距卒得壽七十有七配

張氏先六年卒子四長淮次浦次濬次溢濬充邑庠生  
女二黃撫張忝其婿也孫男九曰棣曰橋曰楷曰栻曰  
梯曰樟曰棐曰采曰果孫女六曾孫男五曾孫女三淮  
等以十二月廿六日即祖塋之隅啓張孺人之窆合窆  
焉禮也銘曰

柳塘之陰陰兮可席以休柳塘之深深兮可舟而遊翁  
今何之風月宛昔遺蔭後人以世翁德

月賓張翁墓誌銘

月賓翁姓張氏諱權字以平號月賓也世為華亭人祖聞父海妣何氏翁故貧少為同邑陳氏贅婿頗好遊佚不得於其舅一旦忽懲創改節務家人生產久之父卒携其室歸養母母性多躁能先意承志得其歡心翁既寧厥居益繕葺門戶相時廢著兼農末之利無何業用大裕有司勸輸粟補散官以謹慎見知凡官府工役多命翁董之濬河幾數百里繕橋梁者三修學宮者二皆殫盡心力獨多勞勩有司率禮遇之晚歲舉鄉飲多從

搢紳士遊教子若孫以詩禮由是月賓翁之名滿鄉閭  
焉翁為人強幹多計算處事斬斬有條序歲治田至若  
干凡特耨必并日卒事一呼而秉耒者數千指割羊豕  
豐酒食以悅其意故人樂與盡力而所入獨厚正德己  
巳庚午歲侵大出餘貲以賑匱乏嗣歲大熟人感翁德  
爭償之倍獲息焉吳俗多侈靡富家衣食稍贏輒事華  
美甚則教僮奴學歌舞為樂子弟習於奢業用是易敗  
翁以寒素起家雖富不忘儉約敝衣舊履弗忍輕棄躬

履淡泊為子孫式故能持其業不衰昔史遷傳貨殖累  
數千百言其措辭多誇大至料億歲之豐凶以著於冊  
則益贅矣翁豈粗有得於其術耶抑偶中耶然其勤於  
作業若饑食渴飲然不為損富若探湯畏疾此真遷所  
述治生者之要雖然遷惟有見於殖貨耳士君子之植  
德者亦如之則其進也孰禦哉事雖末而取喻則遠矣  
翁生於景泰丙子七月二日卒於嘉靖壬辰六月五日  
享年七十有七子三長翔早卒次翺省祭官次翊府庠

生亦早卒孫男二長文教府庠生次文德孫女二先是  
翁配陳孺人於嘉靖庚寅年卒所卜今年正月十六日  
奉翁柩合塋於洞涇之原謀有以彰顯翁者謂予職文  
字嘗銘諸賢士大夫之墓介其姻予友吳君國用亦以  
銘請繼率其子文教持國用狀來徵予不得辭也乃為  
銘銘曰

斤斤兮為人瞿瞿兮勤厥生慊慊兮冀後之亨志學維  
孫尚其慰翁於冥



史仲子簡齋墓誌銘

史君姓也愷名也虞卿字也簡齋號也周之史佚者史之所自出也從宋南渡家華亭張溪名勝同者君始祖也勝同以下靡詳至有曰越秀者生叔敏叔敏生述述生鑑鑑生瓘瓘生紹號東湖克大其家以例受散官者君之考也曰錢氏者君之嫡母曰顧氏者生君者也顧有二子長曰悅君則其季故曰仲子也敏慧端重其幼性也父令析居寧違親言而不忍遠側欽欽伺候顏色

勤儉承意者其孝也兄長區稅君憫其獨勞事必分任者其友愛也事季父如其父推以厚宗黨昆弟罔弗孚懌者其睦族也慎取與重然諾者其誠信也賑卹貧乏無所吝惜者其慈惠也嘗一遇橫逆怡然受之不報者其器量也知貴賤有命甘心布韋不妄意寵榮者其安分也綜緝家政益拓其業居室庭戶規度整整者其幹能也禮賢好士款接餽遺過從觴奕靡有厭倦者其襟度也弘治己丑二月五日其生也嘉靖甲午二月十六

日其卒也沉嘿簡重廓達者當有壽而君年僅三十者則其命也曰陳氏者君之配也曰一傳者其子也有四娃尚在室者其女也哀之恤之鞠其遺孤歸君之骨於先塋且欲圖不朽君者則兄悅也述君之行如石所列者鄉進士兼山沈子也致悅之意來速銘者侍御一齋蘇子也據狀而論次且銘者宮允氏毅齋孫子也銘曰古銘墓重矣非有盛德茂烈不與史子善不出於鄉閭何銘也雖然其為人也無大咎而多可欲且其伯氏之

意勤矣即與一言夫豈過也予故是銘以成其名以慰其靈以著其兄弟之情

從姪明善夫婦合葬墓誌銘

嗚呼此予從姪啓夫婦之墓也昔我先大父司訓贈郎中抑齋府君生我伯父訥菴處士洎我考中憲大夫雪岑府君訥菴生二子長雍號朴齋朴齋生啓啓吾大父嫡冢孫也性開朗有智慧我考嘗字以明善少讀書以家世淡泊之贍給廢業訥菴年四十喪我伯母鰥居三

十年朴齋亦喪偶且老敦實尠生理乃益落莫時啓年  
十九訥菴勉為娶婦婦王氏儒家女厥父樂琴翁少贅  
趙氏故又氏趙自少勤敏于歸乃夫婦協力茹甘苦習  
勞勤啓幹蠱於外王氏力婦作日夜不休家務始獲粗  
立祖若父安其養者幾二十年相繼卒朴齋生子四人  
啓獨竭力襄兩大事無遺悔且一不以累諸弟人稱為  
能子乃益整刷門戶充拓貲業駸駸日就優裕越四年  
遘疾卒時四女三子煢煢哀疚女長未字幼呱呱乳哺

中王氏既匍匐治夫喪鞠育子女備嘗勞瘁十七年婚嫁都盡人稱為賢婦啓之養祖若父也日市鮮美付王氏王氏烹茗以進堂上食之甘退乃悅訥菴壽既高愛孫婦孝視如已女王氏實能色養婉孌朝夕真所謂時其痛痒而抑搔者予所自見也啓既倜儻才幹又與人貿易誠實不欺人故樂就之待宗族鄰黨敬愛有禮予年少啓五歲啓事予甚嚴憚性樂施與歲侵賙恤流殍負其貲者不能償取券焚之謹飭無縱恣行愛山水予

往在告家居每春和輒具酒穀命舟請予遨遊峯泖間  
啓沒而此事廢矣王氏貞淑蓋得於天性方啓之窶也  
盡脫其簪珥畀之曰可藉此為堂上甘旨費凡可以助  
其夫者為之如不及啓之孝與睦族厚鄰多王氏相之  
是故啓不惟無內顧憂而外事亦得具善王氏織紉尤  
精自少至老未嘗廢家業大率賴是慈惠懇惻見貧病  
者憂念之顧婢僕周至啓仲弟吉有二子吉死二子不  
克家至廢業無所歸乃衣食嫂氏數年無厭惡意余每

稱嘆其賢啓生於成化丙申五月十六日卒於正德丙子八月十一日得壽四十有一王氏生於成化丁酉九月八日卒於嘉靖辛丑八月十七日得壽六十有五長子友仁縣學廩膳生娶許氏先姑五日卒次友義娶潘氏卒繼娶張氏次友禮娶龔氏四女蔣正姚文綱李周王之才其婿也孫二餘慶餘禎王氏卒之又明年將以三月廿九日就盤龍塘北新原合塋於啓之窀先啓之塋故無誌於是友仁以書來告曰昔父之有孤也嘗自



恨已弗究於學故督孤學業意甚懇母苦心殫力冀孤有成而孤也弗克振拔尚負二親之志此痛何極惟大人哀而憐之賜之一言刻於墓中之石以垂不朽孤之願也予適以使事寓襄郢得其書讀之憮然傷焉乃為銘曰

夫也行弗戾於凶婦也無忝於三從刻詩玄宮以昭爾終以慰爾子之恫

亡姪克嗣墓誌銘

猶子克嗣者伯兄守齋子也伯兄無子再從兄璧生子  
未期抱之乳為子伯兄早世嗣甫十一歲余自都下歸  
惻然孤也憫然傷之掖于懷泣曰嗟嗟孺子曷克成立  
以慰汝父地下乎問讀何書則小學耳呀然曰遲矣亟  
延師訓之苦澁難入久之乃若稍開明焉長為授室既  
而挈入黌校自是而余宦迹弗常無由勤省策之而嗣  
亦且意向漸廣泛交遊矣治生業矣多僕使有家食累  
矣紛然有以攷其心志於是業不日益而卒於無成嗣

既早孤予撫之若子而嗣亦不以姪自處事予甚孝予性躁每忤意呵詈之俛然受怡然懽也命以事盡瘁為之不慊予意不止其意之懇懇常欲致予懽心者然獨於學業乃似不領略予意斯或其命乎初辛卯之春予北上嗣相予治任又送予至姑蘇予幼女患疹嗣留逾旬乃歸予固疑其業之益踈也未幾督學者至嗣以忘傳註被擯然爾時亦能綴緝成章往時亦多有若是者而獲幸免嗣獨遭焉斯其命矣是秋予來南畿校文嗣

走候予既見悲不自勝長跪膝下曰兒負叔矣兒負叔  
矣恨不即死以謝叔也淚滂然流予姑慰以溫語明年  
復省予官中長跪告予曰兒既以墮廢不能終叔父教  
今惟列於齊民無以光飾門戶惟叔父念之予曰爾何  
欲哉曰兒聞有所謂異途若通事類者兒竊有志焉惟  
叔幸憐也予曰爾既進取無成亦惟安爾之義修身謹  
行耕田讀書亦不失為賢子孫矣而乃復冀望非分且  
予以伉拙雅不能仙仙低下作干人事今乃欲我仙仙

低下千人耶又通事法湏躬歷邊州爾甫出里閑豈堪  
遠涉也嗣無語惟長跪淚簌簌四下予愍之試與謀則  
幸為予許乃以明年八月入閩中業成矣歸中道遘疾  
抵家七日卒信乎其命矣嗣之初抵家也疾已篤猶偃  
偻若欲拜予者予亟止之既乃縷縷為予道其事顛末  
而自慶曰非叔無此又出其所携土物貽予予曰爾客  
久豈得更為此則憮然曰粉兒骨豈足耐叔亦惟見兒  
心耳語畢悵悵自傷今念其言輒心酸也嗚呼悲夫痛

哉嗣以弘治甲子九月十七日生卒於嘉靖癸巳十月  
廿八日年僅三十耳生而眉宇開朗通儻有幹具若必  
有所就者殊不謂其僅止是也守齋諱承德字恒甫廩  
膳生四試有司不第母顧氏太守碧潭公女嗣娶同邑  
胡美之女為婦生子一昌祖學習舉業聘庠友吳日章  
女女一尚幼予於客歲之冬葬先太孺人也欲併及嗣  
而營域甚隘則相地於其西南隅當尚家涇之陽又明  
年十二月廿八日作壙窆焉銘曰

嗚呼嗣也予既督汝以為學而不能勵汝以勤使汝惰  
廢而業弗克就也予嘗示汝以安義而不能阻汝之行  
使汝馳驅嶺海卒嬰疾而弗救也則致汝此者非爾之  
愆實予之咎也刻以斯銘既以慰汝之靈亦以著予之  
謬也嗚呼

文簡集卷五十五

欽定四庫全書

集部

文簡集卷五十八至

詳校官中書<sub>臣</sub>葉元符

中書<sub>臣</sub>劉源溥覆勘

總校官原任中允<sub>臣</sub>王燕緒

校對官修撰<sub>臣</sub>戴衢亨

謄錄監生<sub>臣</sub>張炳



欽定四庫全書

文簡集卷五十六

明 孫承恩 撰

墓誌銘

董母張孺人墓誌銘

吾松西閨之外有董君冲澹者禮賢愛客好納交大夫  
士凡大夫士亦莫不與善每致客滿座牖案整飭樽俎  
潔清僮僕敬勤物俱中式君但與客盡日笑詠未嘗一

起顧而異饌錯進愈益精好以是知其得良配之助也  
厥配張孺人者司訓號雲東者之女也世居松之上海  
孺人自幼淑慎雲東夫婦愛之至每曰是女柔嘉不可  
以儷凡子既乃得冲澹君歸焉孺人既為董氏婦益自  
敬恪孝養其舅姑姑老疾卧床褥孺人日侍湯藥久無  
懈意舅嘗苦瘡瘍孺人躬自洗滌膿穢比沒相冲澹喪  
莖無缺禮事伯叔處妯娌以及姻戚和而有文待妾媵  
與御下人尤多惠澤凡祀享必躬烹飪務極豐潔暇則

率女聽冲澹說孝友廉恥事冲澹嘗膺安鄉伯奏荐教  
讀洎謝病歸遭風波舟幾覆沒繼復罹回祿與負芻者  
之變家故多難孺人檢括內計補室罅穴益自力於勤  
儉未久而家事復裕以故冲澹無內顧憂方日與大夫  
士結吟社優游末年孺人裨益之功居多冲澹既捐館  
孺人孀居且數年益訓迪子若孫無廢冲澹之教用是  
皆彬彬焉正德庚辰九月廿四日孺人得疾卒春秋七  
十有一子徵吉以庠生遇例授指揮僉事女一贅庠生

張桂為婿孫男二華祖繼祖曾孫三來鳳來驥來騏孫  
女一曾孫女三庠生李日章陸希夔其婿也餘亦適士  
人徵吉卜嘉靖元年月日於祥澤之原啓舊藏與冲澹  
君合窆焉先持桂所述狀來謁銘銘不易也古者丈夫  
非異能卓行於法不得銘其女婦見於書傳者亦必瑰  
奇偉烈若夫孝敬勤柔固閨閣中常事疑未足錄雖然  
婦人非有事美不外見舍常事而出強幹謂婦能不可  
也恒之六五以柔而久於其德聖人所謂貞而吉者可

錄豈必盡瑰竒偉烈哉是孝敬勤柔乃其所以為可銘者則余於孺人亦烏得而弗銘也故為著銘曰

坤道靜順婦德貞柔敬慎不違以承夫休婉婉孺人實克有是鞠卑奉尊罔敢弗至秉心初終端爾壹儀恂恂婦子亦克訓之祥澤之原有歸一丘夫君是依妥茲千秋

蔡孺人墓誌銘

孺人華亭沈氏女幼為外舅西峯蔡先生鞠為已女故

氏蔡西峯既賢者又鍾愛篤教之故孺人自少淑慎柔  
婉長適郡庠生朱寧伯甫寧伯尊翁東溪先生以禮御  
家規範嚴肅孺人入其門無違禮敏慧精女工嘗以東  
溪命製深衣得古製意東溪尤重祀享孺人每將事勤  
恪品物東溪尤賢之居常寡言笑慎出入雅潔自整衣  
雖故必澣濯不使纖污朱氏業無厚產孺人每見寧伯  
以生理憂必曰吾家清素亦爾吾固安習之不見不足  
也故衣弊食糲視為當然寧伯雅力學孺人每見其讀

書課文則喜曰此吾先君子業雖成而不廢者也寧伯  
夜誦鼓三伐未休孺人亦執女紅與俱寧伯既抱利器  
不售每鬱鬱孺人曰吾先君子勤苦以老而且無怨尤  
君盛年何遽爾也平居未嘗羨嘆顯人以傷其意旦夕  
躬紡織資寧伯辛苦不問寒暑曰吾婦人無能相君子  
所得盡力者此耳孺人既無子每謂寧伯嗣續大事吾  
不敢效世之妒婦以誤君寧伯卒娶妾生子得免無後  
孺人功也歸之十四年為正德丙子三月廿七日以疾

卒享年三十有九孺人性既良又儒家女婦習熟其所見聞故其處上下莫不有禮而各得其歡心既沒皆哭之而寧伯念失內助又悲其勤窶以沒世也痛之尤深以是歲十二月某日塋於蟠龍塘祖塋之右思有以表其賢不使遽泯泯謂余史官且有世講義又西峯門人也故乞銘其壙曰德靜溫兮又勤厥身甘澹泊兮靡有怨嗟勞弗酬兮遽折磨奄淪亡兮悲奈何

王孺人談氏墓誌銘



王君九章喪其配孺人談氏洎塋命其子持太學生談  
舜耕所為狀來乞余銘惟余之再從姑九章之祖妣也  
頗嘗得孺人之槩而舜耕又孺人從弟且賢者其言多  
可徵故畧節以誌之狀具孺人善甚悉而撮其凡有三  
焉曰事夫而能為婦九章嘗苦羸疾孺人敬事不敢須  
臾懈人有笑其過甚者孺人曰吾正恐未至耳何過甚  
也兩更三年喪相九章不爽於禮綜家政斬斬有叙時  
祀必躬御烹滌賓戚燕會豐腆中度九章晚樂靜居孺

人能如其志凡此皆婦職也曰有子而能為母孺人於諸子愛而知勞諸子甫有知識擇嚴師訓之責以循謹雅飭不得縱恣誇侈以至處家人亦惠而有則故今諸子皆雍睦相與而家人亦勤敏敦朴凡此皆母道也曰事父而能為女孺人既歸王事厥考疇隱翁及母王氏尤不衰疇隱夫婦老且病其藉孺人養者終其身泊卒棺衾多資之諸姪婚娶恒與經理凡此皆女事也嗚呼婦人之行大者三焉耳夫人孰不知而尠克盡何獨備

於孺人也或曰談王俱詩禮之族松之以世家稱能比  
是者不數世家女婦固宜異然余耳目所及世之淫慝  
不善為名門辱者又豈少哉吾聞孺人賦性柔婉髫時  
聽諸兄談說女婦賢烈事則喜曰為人固當爾蓋其穎  
慧識達理道自少志趨則然矣嗚呼茲其所以異歟孺  
人生於正統己巳七月初八日卒於正德戊寅三月廿  
八日得壽七十明年己卯十二月廿二日塋於汭漕之  
原之祖塋子四人長賓義官次寅列入太學次家侯塾

師次宸中都留守知印女一適千戶秦奎孫男七詔謨  
誥謀諤訓諫孫女五曾孫男三聖寶聖壽聖錫昔歐陽  
子曰婦德主內非死節徇難異常之事不得顯然列之  
所謂不得列者非不與列蓋無由列之耳故視其所列  
而賢可知焉夫孺人之行可考而知者既如此而不有  
以顯然列之以示後不將隨世湮沒矣乎茲九章與其  
諸子之所甚懼而請于余也余誼不能辭既為叙次復  
銘以些辭曰

嗟嗟孺人德靜貞些于歸孔時藹芳聲些嚴嚴夫君執  
柔競些賓祭孔修務潔精些訓厥嗣人靡驕矜些家有  
嚴慈不忘將迎些懿懿淑媛閨門法程些胡不耄期遽  
沉寔些巨漕之原風氣萃凝些安爾歸真勿震驚些

陳孺人墓誌銘

孺人姓陳氏浙之錢塘人適同邑鄉善士魏某陳為邑  
右族孺人兄珂由進士為大理卿魏則唐魏鄭公徵之  
後譜牒具存可考孺人生二子長允升郡庠弟子員次

允奎女二長適士人許闕次尚幼生於成化三年九月  
十三日卒於正德十一年六月初九日得壽五十允升  
將以是年月日塋於方家谷之新塋自千里外來持狀  
乞余文誌其墓石既已序次其世代生死復撮其行以  
作銘曰

噫噫孺人詩禮之裔婉婉及笄來殯于魏敬勤靡懈相  
其夫君敦尚儉朴屏斥華紛歲維蠶桑治絲與枲豈無  
下人當率以已歲維烝嘗執庖與烹豈無下人必親乃

誠亦有姻婭恩義以洽亦有朋來樽俎必潔堂閨言言  
婦儀屢屢家庭之間不聞笑喧婉也二子質亦孔茂讚  
於夫君失教誰咎榮顯利達命也莫知人焉不學與廝  
養俱朝歲暮規毋教則倍我豈夫人禽犢之愛子弗率  
教子職則那員余勤劬人謂汝何宵燈熒熒斗轉人寂  
夜如何其汝讀我績汝勵汝業勿憚於勤我有玼珥庸  
給汝勤清白繼承富非所冀我無贏貲懼惰汝志汝有  
弗諶試閱我囊汝克自力將由汝昌婺星隕芒大限忽

及再出苦語垂絕之日敦行勵學勉以弗諼為孝為友  
誨言拳拳噫嘻孺人而僅止是夫失其助子失其恃喚  
彼末俗逐逐百為昧厥永圖競茲刀錐吾觀孺人世亦  
蓋寡較行與言類知道者戔戔新阡孺人之藏我銘昭  
之用以戒荒

楊宜人周氏墓誌銘

吏部考功正郎璞齋楊君之配宜人周氏既卒之明年  
為今嘉靖癸未其子吏科給事中士宜奉父命將以冬



十二月六日葬於尹山之新兆先持所自為狀屬余銘  
其墓余既諾無何余亦有母王宜人喪哀疚中弗克為  
者久之念不可終已勉為序次曰周之先為汴人宋南  
渡初遠祖六以將仕郎宦遊松因留居勝國時有諱寧  
者以武弁著入國朝族日以大寧五世孫庠仕止太常  
少卿季靡號寧素處士者則宜人之考也宜人天性敏  
慧異於凡女子髫時即能事其父母務順適其意處昆  
弟篤友愛簡靜謹飭不苟笑語寧素處士卒旦暮哭泣

至毀瘁其嬪於楊也楊氏業當中落宜人以澹素視女  
弟多婚富家競飾華侈恬然安之無毫髮嘆羨不足意  
方日習婦道舅姑悅其養曰是善事我璞齋充郡弟子  
員偕其伯氏憲副公出讀書館舍宜人與其姆同起居  
和嫺無間躬績織易甘美以資璞齋勤苦中更三年喪  
哀戚無違禮經紀內政賓祭宴享至米鹽細務莫不撙  
節有無用漸致豐裕璞齋與士宜既先後第進士璞齋  
歷內外官所至以廉慎著宜人多內助功其令開化也

賊發桃源逼縣治旦夕且陷宜人以忠義勉其夫子慨然有徇節之志士宜官給事益榮顯嘗得告歸郡有富人以重貨求白其私者密介隣嫗持為宜人壽宜人曰吾方以名節勵吾子而乃欲其為是乎峻却之其卓識類此雅性儉勤雖富貴矣不少自侈怠猶躬率下人事作業璞齋中歲置側室宜人處之恩愛教其子女與已子等故其卒也莫不哭之如所自出生天順辛巳二月十八日卒嘉靖壬午正月廿七日得壽六十有二子秉

義即士宜次秉謙秉鈞秉鑑秉鑰女許少卿董恬子宜  
陽副室沈氏出孫女二聘御史蘇恩子克柔次許聘故  
御史唐禎孫自重嗚呼予觀詩書所載凡女事婦職母  
儀備矣陰德靜貞故婦人之性專致而一多不問學而  
暗合理道余撮宜人之行之大者蓋班班矣逮下以惠  
樛木之仁也愛均嫡庶鴈鳩之德也儉勤至老不衰葛  
覃之義文伯之母之事也若其相夫子以忠義勵子以  
名節又有古烈女之風焉而餘細行不與家人六四異

順以富是謂元吉女德莫盛焉宜人庶幾哉銘以昭之  
也其何媿銘曰

觀表之良必洎厥裏求源之濬但見厥委猗嗟宜人維  
德之懿克相克成是夫是子夫榮既加子養亦備考德  
令終庶究卒始弗永于享以厚厥嗣繩繩雲仍惟夫子  
是似尹涇之原歸藏在此百千秋春尚謹其視

陳母沈孺人墓誌銘

龍塘陳子徠來典華亭教事亟見余閤乎其有思也玆

訖然若欲有所請也既而進曰噫嘻有母氏著賢德下世且十有五祀矣墓中之石尚未有文俟懼其遂泯泯也惟子幸惠之余曰諾哉孺人行維何陳子曰母之為陳氏婦也致孝於舅姑循循懇懇務順適其意而舅姑安之舅患肺疾母日侍湯藥惟勤姑嘗以蹶重傷母旦夕捧持按摩憂苦至廢食姑疾甚母徹夜展轉抱起勞勦形體尪瘁姑感其孝誠且死猶悒悒自傷曰吾負新嬪無以報執舅姑喪擗踊委頓相家君經理巨細悉合

禮度嘗以回祿倉卒抱舅姑二木主避去曰是吾舅所依也非他物比母平居寡言及聞家君談說節義事則反覆究竟時為俛等訓曰讀書欲盡是耳其識之俛幸粗有知識者雖家君之教抑亦慈訓也歲侵有鄰姬持一器來質粟母與之粟而歸其器姬後復以器來凡三至而母無厭色母性端靜和婉動止有常處妯娌有拂意事輒自遜謝減獲有罪過惟從容訓飭之終不見其恚怒色家庭之間怡怡如也遘疾有勸其作佛事者母

拒曰死生命也事佛何益其自少至老始終大都如此其細瑣者弗可縷數也予喟然嘆曰嗚呼俗之弊也久矣夫子弟失所教養學士大夫無完德況於婦人女子乎孺人之行何其備也有婦道焉有婦德焉其全主於倉卒知禮矣訓子以節義知教矣處隣嫗知惠矣疾而却佛事達死生之際矣是非今女婦之事乃古賢哲之事也斯則可以銘也矣越數日陳子復奉其友朱君狀來則陳子所述具在而加詳焉其細瑣者余亦不能盡



錄也孺人姓沈氏蕭山人為山陰處士琢之配陳為詩  
禮名族舅諱泰號直菴有隱德姑朱氏以賢稱孺人幸  
及事之而又賢所謂學其舅姑而稱其為婦者也子男  
一即徠以鄉進士為令官女一適邑士胡良金孺人生  
以某年某月某日卒以某年某月某日享年五十葬於  
仙橋之新兆銘曰

嗟嗟孺人婉德容兮祇順柔嘉抱冲冲兮欽欽嫺事慎  
始終兮懿其芳聲宜爾宗兮玄圃之玉色澤融兮何行

之良壽弗豐兮刻辭幽墟示無窮兮

洪室唐宜人墓誌銘

宜人姓唐氏諱時微之歙邑人四川按察僉事希說之  
長女南京工部尚書洪公之冢婦而今儀部精膳正郎  
任齋承志之配也自幼穎敏精女工僉憲公鍾愛之擇  
其配得任齋于歸焉宜人之為洪氏婦也執孝敬以事  
舅姑姑寢疾湯藥必親嘗頃刻弗離左右姑卒哀痛擗  
踊無違禮撫諸孤幼慈愛備至代執內政巨細事莫不

得宜尚書公悅其賢能任齋補郡弟子員朝夕勸學能  
激發左右其夫子弗以事嬰其心故任齋得無內顧憂  
肆意學問以迄於成而家益日裕柔婉慎勤處妯娌幾  
三十年未嘗失和氣以至睦宗族撫僕御亦皆有恩賓  
祭必躬執烹飪務極精潔輕財樂施與然獨厓於阨巫  
浮屠氏曰與之無謂不若以賙貧乏也中年生子多不  
育每語任齋曰嗣續大事予不敢望君其別圖之任齋  
因置側室連得三子二女宜人愛之如已出長子患痘

憂特甚勤苦抱持廢寢食者六日焉嗚呼是可謂賢也  
矣宜人生於成化乙未六月二十三日卒於嘉靖乙酉  
十二月初四日得壽五十有一止一女嫁同邑黃叅議  
冢孫錦其三子曰廷諫曰廷言曰廷論二女尚幼先是  
宜人當任齋為吏部司務時封孺人其卒也任齋以墓  
銘請予諾之既閱載未果為任齋既進五品階例得加  
贈予文若有待者於是任齋將以明年月日葬宜人歛  
山之隅速予曰可以銘矣乃遂為銘曰

被服粲兮禮容婉兮婦德備矣莫可選兮秉化歸盡逝  
不返兮勒辭揚休納茲坎兮

勅封孺人亡妻吳氏墓誌銘

嗚呼此予亡妻吳孺人之殯也古有糟糠婦孺人從予  
貧賤久矣予何忍忘之念先大夫雪岑府君以節操自  
持自棄諸孤業益凋落予嘗兩上春官弗利五六年間  
貧窶殆甚孺人躬織紉以給薪米比入仕有祿矣然公  
私事殷食指漸衆孺人搏拊籌計以充匱乏勞瘁困憊

竟用蚤世悲夫子何忍忘也惟吳氏詩禮名族外舅一齋先生丙戌進士性介直晚得孺人視諸女獨鍾愛篤教之故孺人自少婉婉識理道甫十七歸予先大夫方嚴好禮孺人習熟其家訓勤慎自律不知婦職之勞也予既早失怙孺人勸相學業每出苦語相激昂予既忝鄉薦孺人見予稍廢學輒曰君事未畢可自逸耶至於謬列史官猶曰君今以文學為職業不自力何以副也予性狷急事弗當意恚憤不可忍孺人曰凡事須緩處

之恚憤何益也予頗好興作孺人曰君處澹薄而用弗  
節必至廣求以濟敗所守矣予每責怒臧獲使令忤意  
孺人曰使夫人而有智慮如君意寧復為君役使耶予  
未嘗不媿服其言孺人事姑甚孝姑每誕日輒禮佛祝  
姑壽至中年猶不廢處妯娌宗族和而有禮御家衆肅  
而有恩性明達識事輕重高下在心孺人惟一女嘗得  
二子不育為予置妾媵三四生子即躬自鞠抱之愛惜  
勤苦然亦多不育每號慟曰天乎吾盡心至矣獨不鑒

卷五十五  
憐耶歲丙戌予當北上孺人遣二妾從予猶留奉予母  
太孺人綜理家務為予子克紹娶婦無遺禮繼聞予卧  
疾京邸觸熱來省予浹旬而病四閱月竟卒予悲其為  
予遠出致大故而孺人於垂絕乃獨謂予曰吾弗獲首  
丘數也但以一見君為幸指二女曰吾得以此面付君  
復何憾又謂二女曰吾平時訓汝能念否母為吾辱也  
其天性明達知命不亂如此孺人生成化庚子十月二  
十一日卒嘉靖戊子九月二日得壽四十九以予滿考



受茲封女嫁府學生黃相餘三女長適國子生陸鏞次  
許叅議戴思子邦傑一尚幼子二長即克紹餘亦幼孺  
人鞠養成者嗚呼予以疎嬾偏僻之性所以資孺人者  
甚至蓋其言論之正可以規予之過其才識之敏可以  
贊予之不及而勤幹經畫予家業所賴焉者今則舍予  
去使予孑立無倚顧念今昔如之何弗悲也予既請告  
移柩東歸其明年是為己丑四月二十日塋於蟠龍塘  
祖塋之側乃收淚述此納諸壙中銘曰

空山寂寥兮傷汝獨處吾終與子同穴兮子其無懼

文簡集卷五十六

欽定四庫全書

文簡集卷五十七

明 孫承恩 撰

墓誌銘

蔣母俞孺人墓誌銘

俞孺人者故節齋蔣先生之配今南京大理司務君惠之母也節齋父竹居翁為子擇婦俞於蔣故有姻稔其女賢故聘年二十于歸循循克執嬪道節齋遊黌校嘗

從師都下因客死孺人聞訃號慟委頓竟日不食哭泣  
無停聲慨然有殉節齋之志舅姑患之莫能譬解乃延  
其父母來申諭之謂婦人喪所天者有可死不可死今  
舅姑老子女幼即死使老者失養幼者失撫是棄絕死  
者而滅蔣氏祀也是大不可孺人乃少休自是屏去華  
飾服粗茹淡躬自織紉助舅姑婚嫁子女費未幾舅姑  
相繼即世孺人益自勤勵總葺家政檢括有無巨細訓  
督其子各勉事事以振作門戶司務君竟以學行成立

舉嘉靖壬午順天府鄉試蓋節齋卒己丑十三年而竹  
居翁亦卒二十七年矣孺人幹理勞瘁支傾補弊甘苦  
燥濕靡不備嘗云初蔣氏業號饒腴而孺人子恩者不  
自檢中乃大落孺人時出苦語訓戒恩卒懼法謫戍遠  
去孺人憂念之每語司務君曰汝兄實自取困然懲創  
深矣茲行殆無歸期吾死不瞑目矣司務君舉鄉闈也  
捷至孺人喜甚而顧恩之遠戍則又悵悵不樂久之恩  
歸乃大慰悅然孺人子然寔人也孺人顧復周至忘其昔之

不率教也其慈愛出天性有不可解於心者嗚呼雨露  
澤物不以美惡而異施父母愛子不以賢愚而殊待斯  
益可觀父母之心矣予蓋因孺人而竊有感焉夫孺人  
則誠慈母矣嫠居教子多苦心矣非有司務君不亦重  
負孺人抑何以藉手見夫君於地下也予聞司務君事  
母孝其官南都也欲奉以就養而孺人戀鄉土不樂去  
自是問遣之使月一至也司務君既偃蹇晚遇孺人以  
垂百之年乃及享其祿養目見先業仆而復起可含笑

入地焉是天之哀憐慈母故有司務君又以遐壽以酬其勤苦者也予是以於孺人母子之事而重為之悲焉孺人生於正統丙辰六月十八日卒於嘉靖癸巳十一月一日享壽九十有八孺人子二人長即恩先孺人二年卒娶陳氏次即司務君娶朱氏先八年卒女二人費景麒徐宗仁婿也孫男一茂元國子生娶張氏繼娶張氏女三長適夏繼元次適鄭夢綱一尚幼皆司務君出曾孫男一名宏喬習舉業聘何氏曾孫女一適侯守謙

司務君將以卒之明年十二月二十二日塋孺人於胡家橋之原以合節齋之兆先期過予請曰惠母且塋願得子銘也予曰諾乃為銘曰

幽幽兮玄堂夫也同是兮予也在旁嗟嗟孺人兮又何怨傷

趙母劉孺人墓誌銘

常熟趙子原錫喪厥母初趙子宦河間逾年以公務便道省母屈途而得訃大號慟曰天乎曷不少延吾母使



予一拜膝下也抵家大號慟問其弟宗錫母死時事宗錫曰母初遘疾也即謝去醫藥強之則曰人生固有盡吾年已耄乃更求活耶疾革目瞑呼問何語強視宗錫曰勉為善恨弗及見汝兄也既又曰諸孫試都下今日故榜必有膺高薦者遂卒詰朝而報汴發解趙子則又大號慟曰天乎曷不少延吾母使予得奉遺教與見汴孫之成以驗母言也於是趙子將以卒之四年為嘉靖甲午治葬事遣汴謁宮家氏毅齋孫子告曰惟母有淑

德懿行孤原錫恐日就泯滅無以詔後人汴子辱在門下敢以誌石之文請汴蓋孫子所舉士也乃為發其狀讀焉狀曰母姓劉氏諱道堅裔出漢大司徒某後母生有至性凝重寡言笑既笄歸我有懷先君諱璧字仲輝以行誼為士林重母相之粹美協一先祖蒙菴性嚴毅諸婦事之少當意然獨稱母為賢婦劉既巨族趙自文敏公後亦世稱饒腴而母謹約履淡素絕無時俗紈綺習蒙庵卒先君甫弱冠母勵勤瘁以是雖公私多故

而業不衰祖妣張孺人寢疾母躬侍湯藥旦夕抱起兩  
閱月弗懈佐先君撫教幼弟長授恒業歲侵焚券棄宿  
逋曰此何時也尚可為取盈計耶均愛諸子不以嫡庶  
異孤原錫洎弟俱側出髻鬢喪先君母鞠育周至少長  
趣令問學曰非此無以自立旦夕訓勵不令習狎遊事  
孤賴是雖淺薄蔑所稱述而幸免大咎以忝所生孤等  
既各有子且日衆母拳拳諭孤等慎教之諸孫粗知向  
方每大比失利母諭曰汝業未精耳勿咎於命當益淬

礪大所就也汴子之卒成者母之教也母生正統壬戌十二月十九日卒嘉靖辛卯八月二十八日享年九十子男四人長天錫娶奚次祖錫娶周繼龔母所出俱先母卒次即孤原錫戈出河間府知事娶海虞大宗伯李文安公女次宗錫胡出娶俞繼曹女一胡出臨山經衛頃惠婿也孫男十一人長汝次漢俱學生天錫出次濂廣東化州吏目次濟次湑俱祖錫出次即汴舉辛卯鄉試第一次瀚國學生次濱習舉業俱孤出次淳州學生

次淵次深俱宗錫出孫女九人適朱纓奚邦周重盛鉞  
朱堂餘許瞿宏陸某楊某施某聘纓廣東按察司照磨  
重國學生曾孫男一十四人曾孫女五人玄孫男一人  
塋以今十二月某日為橫涇之西原合先君之兆狀之  
述孺人如此毅齋孫子曰昔者予校文也蓋得汴卷才  
燧如也異之洎見貌溫如氣偉如愈異之意其必德門  
之後也乃今而信焉其所由來者遠而積也厚矣予嘗  
泛觀古詩書載賢女婦何可計數哉而其事多類夫人

性無二善故曰恒德曰庸行夫婦女坤道也貞而一非如丈夫者可以才美強幹見也孺人恒德庸行備矣古詩書所載賢女婦惟是也而孺人之令則懿範成其子若孫之賢者有徵驗焉是尤可書也銘曰

吳有令族曰趙與劉孺人于歸聯芳並休婉婉孺人貞懿柔嘉內範齋肅穆而不譁胡福高年惟德之致施遺厥後振振孫子有孫孔碩厥聲煌煌慶源所鍾亶其昌哉

楊母王孺人墓誌銘

曹涇楊鶴山錦偕厥二弟將塋其母王孺人先命其子  
沛述孺人行以示其姻宮宋氏孫子承恩俾銘其墓沛  
之狀曰我祖母王孺人者處士聽松之女也年十六嬪  
於楊是為我祖友梅處士配我曾祖怡清處士早世曾  
祖母秉節艱苦晚歲且雙盲孺人事之竭誠盡瘁扶掖  
起居凡飲食衣屨必躬視寒燠久益度弗懈曾祖母有  
二女既嫁而寡而貧孺人迎之歸撫育其孤女則資嫁

之以悅姑意曾祖母壽至九十三乃終孺人事之六十年如一日焉又曰維我祖幼孤多艱門祚衰薄孺人相吾祖拮据卒瘁不憚勞勩業乃用裕我祖既畢婚嫁即斥遣家務優游觴奕孺人獨承之不使有內顧憂洎吾祖卒孺人益專幹理每歲自傭人力田數十畝或勸止無庸自勞則曰吾自知稼穡艱難以事吾姑相吾夫今雖老尚藉此以供祭祀洽姻族何可廢也故始卒弗替君子謂其有恒德焉又曰維孺人性寬裕慈惠處妯娌



洎族屬姻黨俱有恩施及婢僕亦必檢恤周至隣有貧  
嫗每以衣食賙之惟恐不及故卒之日無疏戚遠近皆  
悲之又曰孺人生四子長伯父諱秀先卒配張氏次即  
吾父娶吾母張氏次叔采娶高氏次叔頴娶姚氏女五  
長適散官秦公縉次適光祿丞周公時勅次適唐公僕  
次適戴公忠俱國子生次適馬湖守顧公潛孫男九人  
濂洛滂沛汴浙汶汭洸濂汶早世沛幸忝戊子鄉薦孫  
女六適孫亢宋世承唐自新吳鎧張宗美劉昇劉國子

生孫與唐俱庠生曾孫男三繼椿繼梅繼桂曾孫女四  
初我曾祖母之存也嘗祝多男以大厥宗孺人乃果屢  
育蔓延諸孫姑猶及見之孺人日引幼穉嬉戲姑側我  
曾祖母用是大慰孺人退且督教子若女故我族肩之  
昌且無大辱其先者實由孺人致是有百世之功者也  
孺人生於宣德甲子年三月三日卒於嘉靖甲午年二  
月十五日得壽九十有一卜以丙申年十二月十六日  
塋於後塘涇之原以合吾祖友梅處士之窆於是孫子

錄其狀而叙曰維曹涇楊氏著姓海上舊矣實聞有二  
賢母蓋即孺人姑婦云往時姑勵孀節大學士京口靳  
文僖公嘗作頤貞篇以嘉之至孺人實克孝養郡人大  
司馬張莊簡公嘗為詩並美其姑婦於是姑以節婦以  
孝二母之賢稱甚著而皆躋上壽人咸異之夫世常言  
女婦美不外見雖有淑善莫得而稱固也斯亦善弗至  
耳詩曰鼓鍾於宮聲聞於外此言實之不可掩也賢如  
孺人者謂莫得稱耶予於孺人也固稔焉且有徵焉而

茲且獲沛狀之詳也銘不於孺人而誰銘乃為銘曰  
惟姑之承惟德之恒胡福是膺百欠九齡子孫烝烝蘭  
莒並榮後塘之涇水匯土平鬱其佳城千斯年兮其永  
寧

高室張氏孺人墓誌銘

高子廷諤國華甫喪其配張氏孺人及塋將謁銘於其  
友宮冢氏孫子而先屬其內弟鄉進士張子孚一述狀  
曰我張氏世為松之華亭人孺人者我南安守東海府

君之孫廣西憲副後樂府君之女武岡學正頤元高先生之冢婦今太學生國華延諤之配也及笄而于歸五十八而卒生子一名節女三長適士人陳大綸次適邑庠生姚臣次字京兆楊公幼子秉鑰孫男三承祥承裕承禧孫女一字邑庠生唐君悌之子某生於成化丁酉十二月十二日卒以嘉靖十三年六月三十日其明年月日葬於蟠龍塘之原孺人生有至性克脩賢德吾見其恭而順也幼事父母謹候顏色弗少違嫁而致婦道

於舅姑事君子恒兢兢焉若不敏廷諤累試弗第將奉  
例輸粟而寡貲孺人盡脫簪珥助成之願元以子姓繁  
庶陋其居欲為之所而未能孺人竭力佐廷諤別置居  
焉而舊居悉以讓其弟吾見其儉而勤也躬率織紉不  
以寒暑輟食不厭蔬衣不厭粗撙節有無巨細靡優裕  
焉吾見其恕而慈也臧獲婢媵小過忤意多容之罕以  
詈責檢緝其衣履必豫以周吾見其無媚嫉也廷諤無  
妾侍而孺人以勤勞中歲多疾則數以置妾為廷諤勸

吾見其有恒德也蓋即其平生豐約老少異而所處無  
變焉張子之狀孺人者如此於是廷諤持以授孫子孫  
子讀之嘆曰噫嘻予嘗銘女婦多矣而其可紀之善往  
往類也茲合以孺人之行亦大率同焉夫恭順德之興  
也勤儉德之幹也慈恕德之實也無媚嫉德之容也有  
恒德德之貞也斯女婦之所貴否則驕則悖則惰則侈  
則刻則虐則妒則渝言女德者之所忌也茲其所以同  
而皆足以銘孺人之可縷而數者如此是惡得無銘也

張既甲族高亦德門賢女令妻藹乎有聞五十八年歸藏于土刻辭堅珉以告終古

張室楊孺人墓誌銘

楊孺人者華亭葉謝鎮士族女鄉進士張子義甫下第歸怏怏孺人曰妾諸父昆亦有屢蹶文場而卒振者在無怠其業耳君固當自奮徒怏怏何益於事張子遂復振發偕二三同志共淬礪歲丁酉春孺人妊兩月計張子屆期當北上不欲亂其意潛買墮胎藥下之鑿誤過



投毒品飲即倉猝腹潰死張子時讀書他所聞則驚沮  
馳歸已無及撫尸哭之慟聞者莫不傷之孺人生於弘  
治戊午月日距卒甫四十歲生子二長啓聰聘國子生  
楊某女次啓睿聘葉方伯孫某女二子皆穎秀孺人督  
之學常謂曰汝家書香猶農之耕可弗力也張子每念  
其言後為二子道輒泣下卒之三年為己亥三月日塋  
沙岡祖塋之次張子既痛失賢助而又以為己殞生念  
之不能置欲為孺人不朽者屬其友徐子長谷為狀謁

予銘嗚呼死生亦大矣夫孺人誠賢為其君子然即非有凌逼不得已事而自貽伊戚將亦無少甚乎夫孺人亦聞世有然者而不虞鑒之弗審也斯其命歟然弗食即弗死彼其拂逆矯揉戕傷天和非幽深難喻慧如孺人豈昧是婦人專一之性為其君子者厚耳推是志則蹈難秉節有不優為耶予為是重賢之特論次且銘焉

銘曰

嗟張婦也女德之懋也弗永壽也謂自取也維數爾邁

也徇其所天又何咎也銘以昭之怠荒者之醜也

旌表節婦俞孺人楊氏墓誌銘

常之無錫有節婦焉曰俞孺人者俞君九思暉婦也姓楊氏厥祖某厥父復以儒醫名母張氏臨湘令張泰之姊孺人系本華胄警敏端慤不似凡女子居常即不欲與凡女子儔凡女子亦多敬憚若不敢伍幼從仲父饒州公問字因習孝經小學嘉言善行舉能記憶饒州奇之謂兄西溪翁陰為擇配難其人晚見九思君於鄉塾

喜曰是足配吾女俞故汴人扈宋南渡徙居無錫里中  
代有隱德事各具墓誌俞與楊舊同開交稔聞楊氏女  
氏賢遂締姻好孺人既嬪恂恂自抑事舅姑有禮百凡  
舉動靡弗當舅姑意復能體舅姑意以事祖舅姑朝夕  
溫清滫瀡必親祖舅姑亦靡弗當意稱為賢婦孺人顧  
不以是加於衆婦俞自恭慎勞必任惠必均故稱妯娌  
者亦無不宜之閨門之內雍雍睦睦事夫子愛而有別  
俞君性溫克少業舉子有俊稱而質體孱弱久之以劬

瘁遘疾孺人皇皇然衣不解帶蚤夜竭力調護展轉抱  
起不少懈恒舉手祝天願以身代或脫簪珥具湯藥佐  
舅姑之不給時孺人已有二子長曰憲次曰寰俞君疾  
且愈且作每作輒進二子于床側手旋其頂若不忍離  
別狀瀕危索筆強書冰心雪操字以贈孺人孺人會其  
意指心泣曰願君弗疑即不諱妾不能奉君教者有如  
皦日俞君領之越數日果不起孺人擊胸捫心誓與俱  
逝撫棺一慟屢絕而甦時年甫廿有八云泊塋冒風雨

涉艱險匍匐道路觀者為歎歎隕涕喪畢姻黨有不諒  
其心者孺人察知其計指俞君所遺字以示二子曰此  
何為者是必欲我截髮斷臂耶吾豈歎也人知其不可  
奪遂寢自是履不踰閭謝鉛粉作老母容惟日課二子  
夜躬績挑燈坐更深與俱暇則述其父言動俾識弗忘  
嘉靖辛卯長子憲舉於鄉次子寰以祖命為伯氏後孺  
人無舐犢之戀時戒策之令為校官弟子有聲庠序歲  
戊戌憲復舉進士先是甲午歲鄉人以孺人貞節白諸

監司監司下之郡邑得覈為請于朝至是天子命旌其  
門曰節孝榮被閭里是秋憲先以奉使歸省因迎孺人  
北上明年為己亥九月十日遘疾卒于京邸孺人生於  
成化乙巳五月二十二日距卒得壽僅五十五歲憲娶  
武進張應參女戶部郎中鑑之曾孫寰娶庠彥李君直  
女孫男五人淵沂汶游憲出濂寰出淵聘胡君訓女沂  
聘庠彥顧君國賓女汶聘太學生秦君汶女孫女四貞  
靜貞榮憲出貞愛貞闕寰出貞靜許字都憲宜間楊公

從孫侃貞愛許字薛君某子某憲奉柩南歸將以歲月  
日塋孺人於九龍山合九思君之窀謂予有場屋之雅  
則具狀來告曰憲母早歲喪先君即未死者為憲兄弟  
耳吞嚙冰雪掬辛抱勤以教憲等憲非母無有今日昨  
奉母來茲為圖一日祿養而不幸長逝矣悠悠蒼天此  
痛何極顧惟母之節行不可無以詔後也敢乞文以刻  
諸幽嗟乎節義者人之大閑自世道衰廢彼其佩璫珎  
誦詩書號為士者往往一身事二姓孺人孱然一女子



乃獨能秉志堅確蹈節弗渝豈不卓哉是宜受天之佑  
享福履於耆頤而僅得下壽天道不繆耶雖然脩短者  
數孺人亡矣其芳名炳烈不與俱泯矧憲褒之賢將以  
德業顯著諸孫玉立慶澤未艾孺人又何歉也予方典  
史事將表章賢節以礪頽俗孺人弗銘惡乎銘乃銘曰  
有丘若封有坎其宮我懷伊人穆如清風蕙蘭比馨金  
石比貞鬼神呵護垂千萬齡

亡姊孫孺人墓誌銘

孫孺人者宮宋氏毅齋子之姊也年二十適同邑唐瀚  
字宏之廿三生子名科三十九而寡五十三而科死二  
十年而孺人死矣嗚呼瀚故樂荆翁幼子翁愛而不知  
教少頗習狎遊事翁卒愈不檢業乃凋落孺人衣粗食  
糲握勤抱辛躬績紉以給薪米夜非鼓三伐不休而宏  
之日從羣少年呼盧博塞飲食衎衎而弗顧也久之乃  
益大窘至無以為食與居洎宏之死孺然母子也科年  
二十五予自都下歸為經理有室婦張氏女以織紉甚

能而性且勤於是姑婦早夜力作科亦為鄉童子師歲有束脩之入久之漸足饘粥於是買地洞涇之上結屋治圃始有居焉久之科得咯血疾展轉數月則竭力為醫禱費科死復孑然婦姑也雨窓雪屋朝燈暮藥益自力作未幾復漸給四三年來乃稍覺饘粥有餘者惟其勤也婦姑方更相倚賴留心於貽後之計而奄忽死矣命矣夫悲哉孺人事父母孝友愛子等子素多疾每病則孺人愍愍然憂前太孺人病卧床褥也孺人實相子

奉湯藥不解帶者兩月孺人病予適以幼子疾亟乃不能勤問候躬視其飲食棺斂之具又造次不能盡善也予是以思而益悲之孺人生於成化壬辰月日卒於嘉靖甲午九月初一日得壽六十有三科無子以再從兄子道來為嗣名陶令十二歲讀書而背誦語益矣初宏之死貧無地塋權厝於其遠祖之域洎科死其屋之隙地可塋又孺人不欲子之遠也遂塋之予嘗問姊百歲後欲何從曰從吾兒也疾革復以囑予顧義不可遠夫

也而宏之前塋甚苟又地遠不便葺視乃遷之與孺人  
合窆焉而併刻此以誌或曰稱姊之賢而暴其所天之  
惡禮歟嗟嗟唐子以不檢蕩業致姊勤窶沒世不天甚  
矣予傷吾姊而錄其實何禮也夫春秋之義有諱不諱  
予於唐子無可諱也則又何諱焉銘曰

從子者志合夫者義畢志盡義唐子是遷我志匪誣諒  
無予嫌左有長遂右有流水後千百年知為毅齋子之  
姊之墓尚勿毀也

文簡集卷五十七

欽定四庫全書

文簡集卷五十八

明 孫承恩 撰

墓誌銘

誥封定國太夫人徐母王氏墓誌銘

定國太夫人徐母以嘉靖二十四年四月十二日卒于  
定國公延德敬齋持靖遠伯松田王公狀屬承恩俾為  
文刻石墓中先是昭聖慈壽皇太后之喪承恩待罪春

曹實與敬齋同有事於山陵見其謙恭儼雅循循無驕  
貴態而竊嘆其賢洎往拜其家則見其門第清肅寂然  
無囂塵其僕從亦莫不謹飭異乎他閥閱者竊謂敬齋  
固賢而亦必有自至所以教詔綜理於內則必有為壺  
範者矣乃今讀松田狀而益信意料之合按狀太夫人  
姓王氏都城望族幼有至性慈孝端慤言動不苟及笄  
歸太師榮僖公榮僖公官爵厚祿若易至驕侈太夫人  
習服儉素以佐夫子榮僖稱賢於時至承宗祧歲時享



祭必躬御事事姑盡孝敬居喪執禮無失敬齋幼承慈訓  
規切檢束以故敬齋養成德器動無大咎均親嫡庶有  
鴈鴒之德徐出中山武寧王裔武寧開國元勳功德隆  
盛支胤蕃庶夫人處尊卑上下恩禮周知而輕重罔不  
合宜於是里閭疏戚皆交稱太夫人賢至其族姓之少  
習匪彛者必召至庭下正色以訓京師戚胄羣下恃其  
貴勢多行不檢太夫人素知之故待戚獲尤嚴小不善  
必加箠責不少恕是以無敢縱恣而徐氏以家法稱如

前所言太夫人自侍榮僖已膺誥封敬齋襲爵益封定國太夫人號備享榮養福履康裕三十餘年忽遘疾不起訃聞天子遣禮官諭祭二壇恩命逾等子一嗣定國公即敬齋方以才賢被上簡用贊理營府秩兵務娶張氏昭聖皇太后姪女一適安仁伯張子玉燧孫男四長文璧聘後軍都督府右都督高恕女次文璨文璣文瑞俱幼女孫五人長許聘豐潤伯長子曹文炳餘幼太夫人生成化甲辰七月十七日距卒得壽六十二歲六月

二十七日塋馬鞍山祖塋合塋僖公之兆銘曰

中山邈綿纓簪世顯榮僖光大宜配淑媛淑媛頤頤嬪  
德母慈克配名族罔不是儀玉軸錦緇封章有輝考終  
永寧紀在墓碑

定西侯夫人張氏墓誌銘

都督定西蔣侯喪厥配夫人張氏年僅二十有九先是  
夫人以侯久無嗣數禱於神甫得子彌月而卒夫人憂  
憤得疾遂不起侯既哀其早世又以哭子致死痛之尤

深念無以盡其情者謀託文字述懿美勒之堅珉以示  
久遠屬庠友馬生存信者過予以告既而侯持刑部張  
主政狀復拉馬生來再拜以請予感侯誠懇又馬與予  
有世講誼不得辭也乃誌曰夫人左都督西溟張公長  
女也母劉氏夫人生有至性洎長脩飭言笑不妄淑慎  
柔嘉閑習姆教父母鍾愛之為擇所宜歸既而得蔣侯  
侯自幼失怙而敏慧岐嶷西溟愛之許婚焉夫人既于  
歸恪執婦道歲時奉祭享惟謹以禮法勤儉相助夫子

用是蔣雖業當中微得夫人勸勦而業復起侯且於凡事為得免大過至御羣婢減獲約束無敢或縱家範整整侯即履高爵夫人始膺誥封得今稱詞多褒與識者不以為過侯嘗奉檄督操留都隨復徵還與管府事夫人率從行歸之四載而夫人沒實嘉靖二十七年八月三日其生則正德辛巳四月五日生二女早夭今惟一女年三歲某月日塋夫人於榆河鄉之原嗚呼予嘗觀載籍稱述女婦賢淑率皆庸行千百人一律也謂是固

無足異也及觀世胄之家多處富厚習驕侈尠有克盡理道求如張夫人者雖不越庸行而亦豈易得哉是固可銘也乃銘曰

生於華胄嬪於華胄福履孔厚婦德亦茂天地何咎既奪其後又厯其壽曷怨曷究銘以不朽

賈母金孺人墓誌銘

承天府通判賈鶴年之母卒將治塋鶴年予丁酉鄉試所取士也具狀來謁銘孺人姓金氏故同邑布政某之

孫女奉訓大夫通判真儒之室也生有令質端靜幽閒  
不妄笑語自歸通判君致孝養於舅姑凡甘旨之具與  
賓祭所須無不躬執處通判君和而有禮通判嘗讀書  
山寺中非經月不歸孺人念其勤苦盡出奩中物佐食  
飲勤饋遺之通判感其意益奮志於學而業以成洎通  
判君仕盡力以佐內事故通判得善其職以賢能稱考  
績書最貤封其父母而孺人亦有封號執舅姑喪哀毀  
甚相通判君畢大事慎重無遺悔孺人父卒貧不能塋

為塋之母老無依迎養官中泊卒塋如其父推惠澤於  
通判君之弟昆而和其姻戚馴德淑行協於內外上下  
無怨言孺人可謂賢矣生五男子愛而能教且嚴長即  
鶴年登嘉靖辛丑進士任戶部主事改判承天次鵬年  
廩膳生次鵬年習舉業餘天鶴年娶張氏鵬年娶王氏  
鵬年娶王氏皆仕族女女三張恕王用楊嘉兆其婿也  
孫男三孫女二孺人生成化乙巳十一月初二日卒于  
嘉靖乙巳五月二十五日壽六十一卒之再明年某月



日葬于闕

之原銘曰

懿哉孺人少柔嘉相夫教子勤厥家維德之裕命弗遐  
人思令德感且嗟佳城鬱鬱風氣佳刻石揚休莫汝瑕

誥封宜人楊氏墓誌銘

萊峯周子有母之喪余與萊峯有場屋之誼往弔之萊  
峯哀痛擗踊若不勝余謂之曰嘻慎哉子忘傷生之戒  
乎且子不有嚴君耶萊峯哭少間為余道其母宜人之  
賢而甚悲楚間復具其友提學憲副中江莫子狀躋余

門謁銘余諾未幾而余得目疾病初亦未甚轉展四月大至狼狽毫髮無所見不能少就案且伏枕日久精神衰憊形臞骨立而萊峯之請常殷余心既而萊峯子候曰公恙無苦否先宜人裏事雖未亟而鐫刻欲預公恙奈何嗟嗟萊峯哀慕深矣顧余目青正劇余何以慰子至痛乎而又何以表宜人之令德乎余遂將負萊峯子矣哉乃取中江子狀命侍史讀而聽之狀云宜人姓楊氏今封奉直大夫工部都水司郎中竹窻周君雲鵠之

配湖廣按察司僉事思兼之母也宜人之先宋有仕為  
太子洗馬者諱彥才嗣後皆種德隱耀至東溪君欽授  
伊府典膳以仲子臨江君樞貴贈文林郎延平府推官  
配俞氏實生宜人宜人自幼閑於姆訓性慧敏能文辭  
孝經列女傳諸書悉能通其大義大父博菴君泊東溪  
咸鍾愛之時周封君年少特穎異博菴君一見即器許  
乃命東溪以宜人歸焉宜人拜姑嫜甫三日即出操井  
臼執婦職甚賢周氏殖業中落會歲凶用屢不給封君

大父西隱君與厥考興國主簿一山君皆以儒素安淡泊宜人乃請封君代理家政至盡脫簪珥為助凡內外百需公私逋負咸倚辦焉而宜人處之裕如畧無難色二祖乃相與大悅深以得賢婦為慶祖姑戴孺人姑顧孺人皆繼也宜人周旋其間各順其志兩孺人顧不自安議欲廢產各爨以紓其力宜人聞之泣曰母為爾也大人高年顧不能安子婦之養而忍自為此將置兒女于何地雖吾夫婦為傭以具饘粥亦分所甘心也兩姑

感悟而止宜人事二祖極盡孝敬西隱嘗得風疾每侍  
飲食湯藥輒佐封君捧盤盂代匕箸更歲月不厭封君  
有內外之務宜人密為贊畫咸適時宜其事封君也相  
敬如賓未嘗敢為專行治家嚴肅範以禮度與女婦言  
動引古貞烈為訓誡子姓有過差輒不憚終日其育僉  
憲思兼也自能言即親為訓迪少長令從舅氏臨江君  
學嘗語之曰吾自歸汝父相與備歷艱辛僅能不墜先  
業汝當思績學勵行以自樹立庶不忝爾家世汝舅以

文學為時推重而吾內姪豫孫亦克嚮進汝之師資無  
俟他求也故僉憲盡得細林之傳與朋石楊子並以弱  
冠登丁未進士人皆難之宜人性素儉雖周子迎養宦  
邸食不兼味衣必澣濯曰吾非有靳於是顧侈泰吾性  
所惡也周子宦遊或難於為別宜人輒諭之曰汝勉為  
清白吏無忘而父祖窮約時即吾弗與汝俱吾樂多矣  
用是周子所至以清慎稱宜人之教也宜人疾革之日  
周子適按部黃州心忽動夜不交睫者數日是在宜人

精明之徵固當有異而周子之孝感若或啟之則亦似  
非偶然者宜人生弘治丁巳四月九日卒嘉靖丁巳九  
月十二日享年六十有一子男二長即僉憲思兼娶張  
氏封宜人次思齊娶沈氏女一適陸世惠孫男五紹芳  
紹德紹元紹節紹文孫女三長受張德瑋聘次受恩生  
張元立聘次受沈希望聘戊午年十二月十有八日周  
子塋宜人於蔡成涇南祖塋之次蓋奉其父竹憲封君  
之命禮也中江子之狀詳而理懇至而有文中江與萊

峰道誼交切雅賢其人其於萊峰哀慕至痛固能道之而所以嘉嘆萊峰者意尤肫肫是不可以代余所欲言者乎即余有言又何以加之也命侍史執筆乃即中江子之狀少為櫟括令錄之伏枕聽其讀竊喜曰庶幾可憫周子乎然余終不能就案自讀一過也其於揚榷以附古淑媛者希矣余終有負於萊峰子云遂為銘曰山南有鳥山北有雛一失反哺終夜以呼林風颼颼江月皎皎宜人懿德來者是效



壙誌附

亡妾謝氏壙誌


謝氏名碧桃系出江陰故雖生長於北而婉弱不類娶時年十七柔順敦恪事予并亡妻吳淑人甚謹予性躁急少不稱意即掇之俛然不敢怨每見予怒則曰妾不慧責何辭但願公毋過恚損神也吳淑人頗嚴不甚假借事之愈恭雖大暑據厠或與揮扇淑人感其意自後頗善視之予母太淑人愛護尤甚太淑人卒謝哭之獨

勸予往歲使交南謝憂思致疾生二女三子俱不育子  
以年齒增長急欲得嗣每喪子不能堪謝氏默自憂楚  
背予哭泣而陽勸予曰此數也當是福薄不足為公子  
且公以一身承宗祀可為懷抱中物過傷乎謝氏質素  
薄又以多姓損血乃日羸瘠無一日弗病嘗語予曰妾  
病深矣恐不能久事公雖然妾死有靈豈忍遠去公側  
惟公念之輒嗚咽不能已初吳淑人念謝屢生不育嘗  
以渠弟似齋子俾鞠之謝愛之若已出長名克懋性懶

不喜學子每督責弗順歲己亥予赴召命擬拉同行謝氏請留予問何故答曰克懋以隨公宦不常厥居致荒於業妾今願與之同日併促之予笑曰吾以鞭朴懲其怠猶漫爾也又何有汝一婦人謝固請予亦誤謂或以母子故其言當入有省悟時也許之而克懋益縱恣廢學謝每對之泣弗悛乃憂憤疾益甚遂死死時呼克懋曰吾死命也但以汝故不得與汝父面語此恨何極卒時年四十九歲克懋娶婦曹氏嗚呼予老矣謝亦非少

予豈過為戀戀獨念其憂勤每被予苦而非其所致予  
又素儉從予三十餘年衣飾十不備三四也病革不獲  
一視殯斂之具缺者必多夫欲教子而卒為子累彼不  
知子之終不率教而猶拳拳焉自速厥命是可謂愚而  
亦誠可悲也予故深悲之謝氏死後頻入予夢是其所  
謂不遽離吾側耶越明年將貽書克懋俾塋之而吾宅  
窆未定念又不可久暴也乃權厝於先隴之後二里許  
乃為誌刻石以納於壙而亦銘之銘曰

汝雖無善而亦無咎汝嘗有子而卒無後汝勉欲善後而卒不汝就悲夫吾悼汝之既薄於福又嗇於壽今塋汝近我先塋庶幾地之相前後而誌汝於石或亦名之不遽朽也



文簡集卷五十八